

ZAPISNIK

sa sastanka predsjednika sudova sa područja Zeničko-dobojskog kantona, održanog u Kantonalnom sudu u Zenici, u Sali za sjednice broj 17, I sprat, dana 14.12.2023. godine, sa početkom u 11,00 sati

Prisutni: Predsjednica Kantonalnog suda u Zenici Snježana Čolaković, predsjednik Općinskog suda u Kaknju Eldar Zaimović, predsjednik Općinskog suda u Zavidovićima Uzeir Kalabić, predsjednik Općinskog suda u Tešnju Zdravko Popović, predsjednica Općinskog suda u Žepču Dragica Dragičević, ministar Ministarstva za pravosuđe i upravu Zeničko-dobojskog kantona Nebojša Nikolić, šef Odsjeka za računovodstvo Sektora za pravosuđe Emina Smriko, stručna savjetnica za odnose s javnošću Kantonalnog suda u Zenici Nada Stevanović

Odsutni: Predsjednica Općinskog suda u Zenici Dženana Brković iz razloga učešća kao paneliste konferenciji koja se tiče izvršnog postupka a na poziv Visokog sudskog i tužilačkog vijeća BiH, predsjednik Općinskog suda u Visokom Enes Behlulović iz zdravstvenih razloga-operacije koljena.

Predsjednica suda pozdravlja prisutne, otvara sastanak i konstatuje da su svi pozvani prisutni, osim predsjednice Općinskog suda u Zenici Dženane Brković i predsjednika Općinskog suda u Visokom Enesa Behlulovića, koji su opravdano odsutni, tako da su se stekli uslovi da se sastanak održi.

Prelazi se na utvrđivanje dnevnog reda i konstatuje se da nema primjedbi na predloženi dnevni red.

Dnevni red:

1. Aktuelni problemi i aktivnosti u radu sudova sa aspekta uslova rada, finansiranja troškova sudova i slično.
2. Razno.

Predsjednica suda konstatuje da su prisutni saglasni sa predloženim Dnevnim redom i da se može početi sa razmatranjem po tačkama Dnevnog reda.

Tačka 1.

Predsjednica Kantonalnog suda u Zenici Snježana Čolaković

Predsjednica Kantonalnog suda u Zenici upoznaje prisutne sa problemom nedostavljanja saglasnosti za prijem novih namještenika u Kantonalnom sudu u Zenici, obzirom da su u mjesecu aprilu tekuće godine tri namještenika otišla u penziju, a da je jedan namještenik dobio zaposlenje na Vrhovnom sudu FBiH, te da nijedna od navedenih pozicija nije popunjena.

Rasprava.

Ministar izjavi da je stupanjem na dužnost zatekao preko 200 zahtjeva za davanje saglasnosti, od kojih se 80 odnosilo na sudove, i da su svi zahtjevi upućeni na komisiju, te da što se njega tiče neće biti problema da se da saglasnost za prijem novih uposlenika, ali da se u skorijem periodu očekuje održavanje sjednice na kojoj će se razmotriti navedeni zahtjevi.

Zaključak: Ubrzati proceduru davanja saglasnosti za upošljavanje novih zaposlenika u sudovima.

Predsjednica Kantonalnog suda u Zenici čita Akt Općinskog suda u Zenici broj: 43 0 Su 238280 23 Su od 08.12.2023. godine.

Predsjednica Općinskog suda u Zenici poziva resorno ministarstvo i uvaženog ministra da razmotri pismeno obraćanje predsjednika sudova sa područja Kantona i Kantonalnog tužilaštva Zeničko-dobojskog kantona u vezi saglasnosti za zapošljavanje na upražnjenim radnim mjestima te poduzme potrebne aktivnosti u tom pravcu. Općinski sud u Zenici unatoč pismenom a i usmenom obraćanju i silnim urgencijama, još uvijek nije dobio tražene saglasnosti radi zapošljavanja na radnim mjestima. Ukazuje da u zemljišno-knjižnom uredu postupaju 3 zemljišno-knjižna referenta na 150.00 stanovnika, da nedostaje trećina daktilografa tako da rade istovremeno kod više sudija, a slična je situacija i u ostalim odsjecima. Situacija je vrlo teška i to duži vremenski period u kontinuitetu. Dakle, apeluje da ministarstvo poduzme sve aktivnosti u cilju osiguranja uslova za nesmetan rad suda.

Takođe, predsjednica Općinskog suda u Zenici poziva resorno ministarstvo i uvaženog ministra da razmotri održavanje sastanka sa predsjednicima sudova u vezi uredbe kojom je regulisano pitanje naknade za dežurstvo, koji je bio najavljen ali nije došlo do njegovog održavanja.

Predsjednica Kantonalnog suda u Zenici čita Elaboraciju Općinskog suda u Visokom o okvirnim temama za sastanak predsjednika sudova s područja Zeničko-dobojskog kantona broj: 041-0-SU-23-002362 od 28.11.2023. godine.

Općinski sud u Visokom vrši sudsku vlast za područje općina Visoko, Vareš, Olovo i Breza u okviru stvarne nadležnosti utvrđene zakonom u sjedištu suda u Visokom, a za područje općine Olovo u Odjeljenju izvan sjedišta suda u Olovu koje je sastavni dio ovog suda.

Poslovi u nadležnosti Općinskog suda u Visokom obavljaju se u skladu sa utvrđenim godišnjim Rasporedom poslova sudija i stručnih saradnika za tekuću godinu, prema referatima na koje su sudije raspoređene i procentom dodjele predmeta prema CMS-u kao i utvrđenim Rasporedom poslova uposlenika Općinskog suda u Visokom.

Svi polugodišnji izvještaji i informacije za 2023. godinu su blagovremeno sačinjeni i dostavljeni VSTV-u, predsjednici Kantonalnog suda u Zenici i nadležnim institucijama.

Plan rješavanja predmeta je na dan sačinjavanja ove informacije realizovan u procentu od 93,40%.

Provode se aktivnosti u okviru Projekta harmonizacije podataka na nekretninama kojim upravlja Federalna uprava za geodetske i imovinsko-pravne poslove.

Web stranica suda se svakodnevno ažurira sa aktuelnim informacijama, svi zahtjevi za pristup informacijama blagovremeno su riješeni.

Navedeni podaci ukazuju da se u Općinskom sudu u Visokom u skladu s važećim propisima poduzimaju aktivnosti i vrše poslovi koji doprinose efikasnom radu suda i obezbjeđuje zakonito i pravilno funkcionisanje suda u okviru zakonom propisane nadležnosti.

Što se tiče problema sa aspekta uvjeta rada, finansiranja troškova i slično, poteškoće sa kojima se suočavamo odnose se na činjenicu na koju ukazujemo dugi niz godina da zgrada Općinskog suda u Visokom nije funkcionalna za potrebe suda.

Naime, zgrada nema lift, ima jako usko stepenište koje stvara teškoće prilikom kretanja, posebno starijim licima ili invalidnim osobama a i zaposlenicima prilikom kretanja, nošenja predmeta kao i korisnicima usluga suda.

Prostorija prijemne kancelarije nije adekvatna za prijem stranaka, hodnik u prizemlju zgrade je nedovoljnog prostora, zgrada nema prostor ni za arhivu ni za odjeljenje za zemljišnoknjižne poslove. Odjeljenje za zemljišnoknjižne poslove i prostorije arhive u kojima se čuva kompletna registraturna građa smješteni u zgradi koja je vlasništvo Općine Visoko odnosno Gradske uprave (stara zgrada suda) i koje prostorije koristimo, za sada, bez plaćanja naknade. Nedovoljan prostorni kapacitet dugoročno gledano, uz sve navedene činjenice,

predstavlja najveći problem u smislu obezbjeđenja fizičkih uvjeta rada, posebno kad se uzme u obzir priroda posla, održavanje ročišta, postupci koje se vode pred sudom, sve usluge koje koriste građani u sudu i imajući u vidu da se radi o sudu koji vrši sudsku vlast za područje četiri općine.

U skladu sa Budžetom Zeničko-dobojskog kantona („Službene novine Zeničko-dobojskog kantona“, broj 3/23) za rad Općinskog suda u Visokom u 2023. godini osigurana su budžetska sredstva u ukupnom iznosu od 3.166.884,00 KM koja se u potpunosti zakonito i efikasno koriste za namjene određene Budžetom međutim imajući u vidu obim posla, potrebe koje su objektivne i smjernice i upute VSTV-a, odobrena budžetska sredstva nisu dovoljna. Analizom izvršenja budžeta do 21.11.2023. godine procijenjeno je da postoji deficit sredstava na poziciji za bruto plaće i naknade zaposlenih cca 185.000,00 KM na poziciji Doprinosi poslodavca cca 27.000,00KM, na poziciji Izdaci za komunalne usluge cca 17.000,00 KM i na poziciji Ugovorene i druge posebne usluge cca 45.000,00 KM što je posljedica nedovoljno osiguranih budžetskih sredstava na navedenim pozicijama, odnosno umanjениh u odnosu na iskazani budžetski zahtjev. Takođe na poziciji Ugovorene i druge posebne usluge nedostaju nam i sredstva za obaveze prema Fondu za profesionalnu rehabilitaciju i zapošljavanje osoba sa invaliditetom a prema Obavijesti koja nam je dostavljena od 09.11.2023.godine.

U vezi sa aktom Ministarstva finansija broj: 07-03-01/11-2345-1/23 od 20.11.2023. godine za izradu Izmjena i dopuna Budžeta Zeničko-dobojskog kantona za 2023.godinu dostavljene su informacije o stvarnoj procjeni izvršenja rashoda i izdataka po pojedinačnim kodovima za Općinski sud u Visokom.

Finansijska sredstva potrebna za izvršenje Programa rada Suda za 2024. godinu, iskazana su u Budžetskom zahtjevu na bazi podataka o utrošku sredstava u tekućoj godini i planiranog obima poslova i broja uposlenika u 2024. godini, koja sredstva su neophodna kao uvjet za ostvarenje zadataka planiranih programom rada suda i realizaciju odluka VSTV-a.

Predsjednica Kantonalnog suda u Zenici poziva predsjednicu Općinskog suda u Žepču da iznese elaboraciju Općinskog suda u Žepču.

Predsjednica Općinskog suda u Žepču čita izvještaj.

Opće poznato je da Općinski sud u Žepču već duži vremenski period ne raspoláže sa kadrovskim kapacitetima. U ovome trenutku neophodno je razmotriti hitnu mogućnost upošljavanja ZK referenta, što predstavlja uvjet za provođenje harmonizacije nekretnina na području Općine Žepče. Napominje da je upošljavanje ZK referenta bezuspješno traženo u 2022. i u 2023.godini, te da su za 2024.godinu proračunskim zahtjevom za ova radna mjesta predviđena sredstva za plaće i ostale naknade.

Također istom i brzom procedurom neophodno je uposliti dva pripravnika i dva volontera, kako bi se ovaj sud mogao uključiti u projekte VSTV-a, a tiču se nove interne organizacije kroz delegiranja administrativnih zadataka sa suca na administrativno osoblje.

Na području Općine Žepče dolazi do čestog i dugotrajnog nestanka električne energije. Uzroci se nalaze u greškama i učinjenim tehnološkim propustima na izgradnji dalekovoda elektro prijenosa. Stoga postoji opravdana bojazan da će doći do oštećenja informatičke opreme kojom je opremljen sud. Da bi se izbjegle ove štete neophodna je nabavka agregata koji bi preuzimao napajanja u okolnostima nestanka struje.

Napominje da je proračunskim zahtjevom za 2024.godinu u okviru pozicije 821300- „Nabavka opreme“.

Predsjednica Općinskog suda u Žepču završava svoje izlaganje.

Predsjednica Kantonalnog suda u Zenici poziva predsjednika Općinskog suda u Tešnju da iznese elaboraciju Općinskog suda u Tešnju.

Predsjednik Općinskog suda u Tešnju čita izvještaj.

Budžet Općinskog suda u Tešnju za 2023.g. iznosi 1.682.394,00 KM. Izvršenja budžeta sa 30.09.2023.g. iznosilo je 1.347.030,00 KM. Da bi Sud mogao redovno obavljati svoju funkciju zbog koje je osnovan bilo je neophodno kroz rebalans budžeta obezbijediti nedostajuća sredstva u iznosu od 152.000 KM (Rebalans je prošao na Vladi ZDK, ali je neophodno da ga Skupština potvrdi kako bi postao operativan).

Usvajanjem rebalansa u iznosu od 152.000 KM budžet općinskog suda bi iznosio 1.823.350 KM. Ovo povećanje budžeta za 2023.godinu posljedica je sljedećih faktora: povećanja plaća sudija od 01.01.2023. godine, povećanja plaća toplog obroka državnih službenika i namještenika u Zeničko-dobojskom kantonu od juna mjeseca 2023.godine i primjenom Uredbe o naknadama sudaca i tužitelja u pravosudnim institucijama broj: 0202-14754/23 od 28.09.2023.godine, za obračun dežurstva/pripravnosti, te naknade za odvojen život i smještaj u mjestu rada od 17.10.2023.godine. Zvanična inflacija u BiH za 2023.g iznosi 17% te je to dovelo do poskupljenja svih roba i usluga koje ovaj sud nabavlja za svoje potrebe i rad, čak i do 50% u odnosu na isti period prošle godine. Došlo je do poskupljenja vode, komunalija, grijanja, poštanskih usluga. Takođe došlo je do poskupljenja roba i opreme koje nabavlja ovaj sud za svoj redovan rad.

Općinski sud u Tešnju od samog prelaska u novu zgradu ima problem arhivskog prostora. Arhiva ovog suda nalazi se u dijelu pisarnice koji je apsolutno neuslovan sa aspekta zaštite od požara i ne ispunjava niti jedan uslov koji je propisan za zaštitu i rukovanje arhivom. Sud planira u budžetskom prijedlogu za 2024. godinu sredstva za dogradnju objekta kojim bi se trajno riješilo pitanje arhivskog prostora Općinskog suda u Tešnju. U tom cilju nadam se da ćemo imati adekvatnu Vašu podršku kao i resornog ministra prilikom usvajanja budžeta za 2024. godinu Općinskog suda u Tešnju.

U 2024.godini neophodno je izvršiti nabavku računarske opreme koja je dotrajala nema sadašnju vrijednost samo upotrebnu, a to dovodi do povećanja troškova popravke i servisiranja iste. Pored navedenog računarska oprema ovog suda samo djelimično ispunjava uslove postavljene od strane VSTV-a. Pored računarske opreme neophodno je nabaviti i drugu opremu, a sve u cilju obezbjeđenja redovnog i efikasnijeg rada ovog suda: izvršiti klimatizaciju zgrade, popravku sistema grijanja na kojem je potrebno izvršiti zamjenu cijevi i pojedinih grijnih tijela zbog dotrajalosti i kvarova.

Generalno zbog povećanja cijene grijanja koja trenutno iznosi cca 8 KM po 1m2 potrebno je pokrenuti inicijativu za utopljanje objekta Općinskog suda u Tešnju kroz energetska efikasnost i kroz projekta toplotne pumpe i sl. preći na drugi režim toplotnog grijanja, a što bi dovelo do uštede sredstva u budžetu Općinskog suda u Tešnju.

Općinski sud u Tešnju je smješten u objekat koji je izgrađen 2010.g. Od 2010.g. nije do 2023.g. ulagano značajnije u održavanje objekta. U 2023.g. u budžetu je obezbjeđeno 50.000,00 KM koji su utrošeni na redovno održavanje i to popravka krova, izolacije na krovu, zamjena oluka i odvoda, popravku ograde i krečenje, kao i djelimično klimatiziranje prostorija iz razloga što je došlo do neotklonjivog kvara na centranom uređaju za klimatizaciju (ista je oštećena u poplavi 2014.godine).

Općinski sud u Tešnju planira donošenje novog Pravilnika o unutrašnjoj organizaciji i sistematizaciji radnih mjesta i istim će doći do povećanja jedne sudijske pozicije (odobrene od strane VSTV-a) te 2 pozicije državnih službenika i 1 pozicije namještenika, a što će omogućiti i bržu popunu upražnjenih radnih mjesta. Donošenjem istog omogućava se planiranje sredstava u budžetu kao i transparentniji nastup prema Ministarstvu za pravosuđe i upravu i Ministarstvu finansija.

Što se tiče aktuelnih problema u radu suda sa aspekta uslova u radu tu je konstantan problem u 2023.g bio da se teško i sporo vrše popune upražnjenih radnih mjesta što dodatno otežava rad ovog suda. Potrebno je ubrzati procedure davanja saglasnosti od nadležnih kantonalnih ministarstva ili ih pojednostaviti tako da od momenta pojavljivanja upražnjenog radnog mjesta (davanjem otkaza od zaposlenika, odlaskom u penziju i dr.) pa do raspisivanja javnog oglasa prođe što manje vremena. Trenutna praksa je da procedure traju i do 6 mjeseci. Što se tiče uslova rada u sudu očito je nezadovoljstvo državnih službenika i namještenika u

pogledu njihovih plata i naknada pa se nadamo da će postojeća vlada aktivno uzeti učešće na poboljšavanju radnopravnog statusa istih kroz potpisivanje novog kolektivnog ugovora.

Predsjednik Općinskog suda u Tešnju završava svoje izlaganje.

Predsjednica Kantonalnog suda u Zenici poziva predsjednika Općinskog suda u Zavidovićima da iznese elaboraciju Općinskog suda u Zavidovićima.

Predsjednik Općinskog suda u Zavidovićima čita izvještaj.

U Općinskom sudu u Zavidovićima imenovano je 9 redovnih sudija, uključujući i predsjednika suda, 1 dodatni sudija i 2 stručna suradnika, s tim da će jedan stručni suradnik početi sa radom u ovom sudu početkom sljedeće godine.

Kada je u pitanju upošljavanje državnih službenika i namještenika u 2023. godini, u ovom sudu je okončan postupak prijema šefa ZK ureda, jednog daktilografa i jednog IKT referenta, a u proceduri je postupak pribavljanja suglasnosti za upošljavanje jednog ZK referenta.

Zbog odsutnosti jednog ZK referenta iz zdravstvenih razloga i još jednog naknadno upražnjenog mjesta ZK referenta, ZK ured radi sa smanjenim kapacitetom kada su u pitanju ljudski resursi. Sud aktivno radi na rješavanju ovog problema s ciljem popunjavanja ovih upražnjenih pozicija i ponovnog uspostavljanja rada ZK ureda u punom kapacitetu.

Općinski sud u Zavidovićima u svom poslovanju nastoji poštivati sve zakonske rokove. U tu svrhu usvojen je Strateški plan rada 2022-2024, Plan integriteta, Godišnji program rada za 2023. godinu, Plan rješavanja predmeta, Odluka o predviđivim rokovima, Plan aktivnosti za unapređenje kvaliteta rada i dr., te se aktivno radi na realizaciji svih ovih planova i strategija.

Aktivno se provode i mjere Akcionog plana za brže rješavanje predmeta krivičnog djela korupcije i organiziranog kriminala.

Ovaj sud redovito izvršava sve obveze kada je u pitanju ostvarivanje godišnje norme suda, tako da se očekuje prebačaj prosječne godišnje norme suda i za 2023. godinu, odnosno ostvarenje prosječne godišnje norme suda u procentu većem od 100 %.

Općinski sud u Zavidovićima je započeo ovu godinu sa 9.207 predmeta, zaprimljeno je 9.809 predmeta, a riješeno je 10.904 predmeta. Ostalo je neriješenih još 8.112 predmeta. Od tog broja u sjedištu suda u Zavidovićima je ostalo neriješenih 6.388 predmeta, a u Odjeljenju u Maglaju 1.724 predmeta.

Konstantno se radi na smanjenju broja starih predmeta. Plan rješavanja predmeta za 2023. godinu realiziran je u procentu većem od 90 %, opravdano se očekuje još veća realizacija ovog plana do kraja tekuće godine.

Na ostvarenu realizaciju Plana utjecao je niz čimbenika kao što su: struktura i složenost predmeta, neodazivanja stranaka i branioca po pozivu suda, problemi sa utvrđivanjima adrese stranaka, predlaganja novih dokaza od strane stranaka u kaznenim postupcima, priliv predmeta hitne prirode, odsutnosti sudija zbog bolovanja i sl.

Na svim ovim predmetima se aktivno radi i nastoji se iste okončati u što kraćem roku. Na sjednicama sudskih odjeljenja, kao i na Stručnom kolegiju, se raspravlja o ovim predmetima i nastoji se iznaći načina da se ovi predmeti što prije završe. Svim sucima i stručnim suradnicima je naloženo da poduzmu sve potrebne radnje kako bi se plan rješavanja predmeta ostvario u cijelosti.

Uvjerenja i Zk izvadci se u pravilu izdaju odmah po podnesenom zahtjevu stranke. Svim strankama koje se obrate sudu sa svojim upitom, ovaj sud u najkraćem roku dostavlja traženi odgovor.

Kada su u pitanju uvjeti rada potrebno je napomenuti da je sud usprkos svim finansijskim problemima, u 2023. godini, uspio nabaviti sav potreban materijal (papir, koverta, omote, tonere, ...) za neometan rad suda. Sud je u cijelosti opremljen kompjuterskom i drugom potrebnom opremom (nabavljena je nova kompjuterska oprema koja zadovoljava sigurnosne zahtjeve win 11 operativnog sustava).

Tokom 2023. godine sve sudije su pohađale obveznu edukaciju u organizaciji CEST-a, a sekretar ovog suda je prošao obuku u organizaciji Agencije za državnu službu FBiH. Interno stručno usavršavanje realiziralo se nabavkom stručne literature, redovitim praćenjem službenih listova te redovnim održavanjem sjednica sudskih odjeljenja, internom elektronskom razmjenom raznih sudskih odluka i sl.

Svim sudijama i stručnim suradnicima omogućen je uvid u drugostepene sudske odluke i odluke po reviziji koje od viših sudskih instanci budu vraćeni u ovaj sud čime se doprinosi ujednačavanju sudske prakse u ovom sudu. Pored navedenog, sudsku praksu sudije i stručni suradnici prate putem stručne literature koja se nabavlja u sudu, putem interneta i putem Centra za sudsku dokumentaciju VSTV-a BiH.

Preko web stranice ovog suda omogućen je svim strankama u postupku uvid u predmete putem interneta, kao i dobivanje informacija o zakazanim ročištima i drugih korisnih informacija.

Općinski sud u Zavidovićima susreće se sa nizom problema koji utječu na rad suda, kao što su: nedovoljno finansijskih sredstava za nabavku potrebnog materijala, opreme i obavljanje nužnih popravaka, loša unutarnja i vanjska stolarija, nepopunjenost svih predviđenih radnih mjesta.

Po pitanju osiguranja mentorstva za novoimenovane suce objavljen je poziv svim sucima za poziciju suca mentora. Nakon što je utvrđeno da se nitko nije javio na interni poziv, obavljen je i razgovor sa sucima i utvrđeno je da nema zainteresiranih sudaca za ovu poziciju. Kako bi se osiguralo eksterno mentorstvo, ovaj sud se pismeno obratio na adresu više sudova koji su imenovali mentora, te se nadamo pozitivnom odgovoru i rješavanju ovog pitanja na način angažiranja eksternog mentora.

Predsjednik Općinskog suda u Zavidovićima završava svoje izlaganje.

Predsjednica Kantonalnog suda u Zenici poziva predsjednika Općinskog suda u Kaknju da iznese elaboraciju Općinskog suda u Kaknju.

Predsjednik Općinskog suda u Kaknju čita izvještaj.

Što se tiče problema sa aspekta uslova rada, finansiranja troškova i slično, ne može se reći da se radi o posebnim problemima.

Analizom trenutnog stanja, konkretno računarske opreme, neophodna su značajnija sredstva za nabavku nove računarske opreme za pristup novim servisima (Windows Server Standard 2022) koji su prema uputama VSTV-a planirani da se ispoštuju do 2025. godine. Trenutno sud raspolaže sa 13 računara koji su kompatibilni sa Windows Server Standard 2022 i ispunjavaju tehničke uslove. Nedostaje još 25 računara sa licencama. Također je potrebno izvršiti nabavku laptopa (po mogućnosti dva) i mobilnog/prijenosnog printera A4 formata u svrhu on line edukacija i sačinjavanje zapisnika za ročišta koja se održavaju van suda, te nove opreme za audio snimanje glavnih pretresa i jednog dokument skenera, te određeni broj laserskih printera.

Trenutno su u toku radovi na ugradnji lift platforme za pristup licima sa umanjenim tjelesnim sposobnostima. Sam postupak javne nabavke je trajao od juna do novembra kada je zaključen ugovor sa izvođačem radova i radovi su zvanično počeli 11.12.2023.godine sa rokom završetka od 45 dana. Vezano za plaćanje ugovorene obaveze za predmetnu nabavku u iznosu od 40.360,32 KM (sa PDV-om) održan je sastanak sa ministricom finansija dana 04.12.2023.godine.

Problematika na koju niz godina ukazujemo odnosi se i na status zgrade suda koja je u vlasništvu Općine Kakanj, a koja se knjiži kao stalno sredstvo kantona. Revizorski izvještaj je ukazao na nepravilnost u tom dijelu knjiženja, međutim, kako je to je nadležnost vlasnika zgrade i eventualno nekog budućeg statusa nakon dogovora sa kantom, sud i dalje knjiži zgradu kao stalno sredstvo ZDK. Zgrada suda je stara skoro 60 godina i rekonstrukcija svih instalacija (elektro, vodo-kanalizacione i dr.) je krajnje nužna.

U skladu sa Budžetom Zeničko-dobojskog kantona, za rad Općinskog suda u Kaknju u 2023. godini osigurana su budžetska sredstva u ukupnom iznosu od 1.456.475,00 KM koja su u potpunosti zakonito i efikasno iskorištena za predviđene namjene, međutim ista su nedostatna za značajnije poboljšanje uslova rada. Deficit se pojavio na poziciji za bruto plaće i naknade zaposlenih, dok je na ostalim pozicijama, dijelom i putem preraspodjele osigurana potrošnja u okviru odobrenih sredstava.

Ističemo da je Općinski sud u Kaknju izrazio spremnost za pristupanje Memorandumu i projektnim aktivnostima za unapređenje kvalitete rada krivičnih odjeljenja u sudovima, koji su zaključili Kantonalni i Općinski sud u Zenici, Kantonalno tužilaštvo Zenica i Regionalna advokatska komora Zenica, te o namjeri je obaviještena predsjednica Općinskog suda u Zenici.

Predsjednik Općinskog suda u Kaknju završava svoje izlaganje.

Diskusija o naknadama za dežure i pripravnost sudija i tužilaca.

Zaključak: U što skorijem periodu zakazati tematski sastanak sa ministrom radi razmatranja izmjene Uredbe o naknadama sudija i tužilaca u pravosudnim institucijama Zeničko-dobojskog kantona u pogledu visine naknade za dežure i pripravnost sudija.

Prisutni predsjednici sudova žele da istaknu i pohvale dobru saradnju sa ministrom za pravosuđe i upravu, kako u ranijem tako i u sadašnjem mandatu.


Tačka 2.

Nije bilo drugih prijedloga i tema za raspravljanje.

Predsjednica suda je zaključila zajedničku Sjednicu predsjednika sudova i prisutnim se zahvalila na dolasku.

Sastanak završen u 12,45 sati.

Zapisničar
Nada Stevanović



PREDSJEDNICA SUDA

Snježana Colaković